



Elas han s'udiu tier la squadra che ha preparau la fiera, da sen. sora Ulrica, sora Placida, sora Ermelinda e sora Miriam.

FOTO AUGUSTIN BEELI

«San ins duvrar, ni eis ei mo per bi»?

Sonda ei stau in gi da bellezza che ha carmalau dad ir giadora. A Glion ha bia glied cumbinau quei cun ina viseta alla fiera da pelischs sil bein digl **Albertushof**. Las soras **dominicanas** ston dustar tutta rauba dall'immobiglia ch'ei en vendita.

AUGUSTIN BEELI/FMR

En diesch stanzas, ella casa dil migiur, sin laurta, el clavau annex tochen silla talina, lu ella cuort ed en bargia han ils visitaders anflau massa caussas. Tgi ch'ei staus sonda sigl anteriur bein puril digl **Albertushof** a Glion ha astgau serender en ina epoca dil vargau. Naven dils sacs da truffels, sutgas e mobiglias da tutas uissas, vischala, ina roscha brocs da pieun, cazzolas, canastras da resti, cozzas e teppis han ins viu tut. L'acziun haveva ina finamira: svidar casa e clavau. La soras **dominicanas** da Glion han organisau per la secunda gada ina fiera da pelischs en quei liug. Onn vargau han ellas vendiu ristials e faultschs, isaglia d'iert e rauba purila. Uonn han ils visitaders astgau mirar ed aquistar per gronda part rauba dil tenercasa.

Per ovra caritativa

La fermada dil cuors Glion-Ruschein digl auto da posta ei gest avon casa. Gl'access alla fiera da

pelischs digl **Albertushof** havess buca saviu esser megliers per persunas senza agen vehichel. In ni l'auter che ha priu gl'auto da posta ei returnaus cun mauns pleins. E bugen havessan quellas persunas profitau d'in carr annex.

Il success e gl'interess d'avon in onn han intimau *Lea Cajacob* e sia squadra da diesch dunas da repeter l'occurrentza. «Il recav dalla vendita va a favur dall'ovra caritativa brasiliana CESIM», ha ella declarau alla FMR. Igl ei in center social el marcau dad Itapetinga el stadi federal da Sao Paolo. La procura dallas misiuns dalla claustra sustegn dapi il 2001 quell'instituziun per affons dalla via. Cun lur preschientscha han tchiens persunas susteniu quell'ovra.

Numerus ein circulai ellas diversas stanzas, han acquistau in ni plirs battegl ed ein sesi silsuerter cun lur «custeivladads» ella cuort. A meisa ed en cumpignia han ins schau gustar ina ligiongia ed ina bubronda. Bia glied ha mussau interess – ni plitost marveglias – d'entrar

egl areal digl **Albertushof**. Gl'anteriu menaschi puril claustral ei staus bunamein tschien onns la basa dil provediment alimentar dalla casa materna e dil spital da Glion. Cheu tenev'ins animals, naven dils aviuls tochen tier la biestga, pors e gaglinas. Ers, Orts e curtgins cun puma, fretgs e flurs fagevan part dalla caddina d'atgna produziun.

Ella casa dil migiur e la stalla annexa haveva la squadra che ha organisau la fiera exponiu massa rauba. Objects che han giu antruras muntada e funcziun numman ins oz «anti-quitads». «Sas propi duvrar quei, ni eis ei mo per bi?» ha ina persuna dumandau in enconuschent che era gest turnaus ella cuort culs mauns pleins. Duront la tura tras casa e stalla havevan plirs objects carmalau el: in brieda picun, in teppi reschniev tessiu dallas mungias, in canaster cun manetscha, in cudsich ed ina cazzetta alla moda veglia. «Quels objects sai jeu duvrar si mises», ha il cumprader manegiau.